

保定府志

第二十九冊 卷七十二 卷七十三

列女四

完縣 蠡縣
雄縣

保定府志卷七十二

列傳二十六

列女八

雄縣

國朝

完縣

庠生劉泰貞妻崔氏年二十五歲泰貞卒氏孝事衰姑不出閨門當寇至猶堅持節操不易其守撫二子成立長大昇次大興均入庠氏壽六十餘歲郡守楊爲之請旌

源頭村民婦楊氏夫外出氏爲寇羅四所劫不受辱厲聲罵之絕粒數日遂被害

田錫祐咏楊烈婦詩山石韞美玉沙廣儲良金農家楊氏婦蕙質士夫心言笑不苟爲日勤績與鍼及笄歸夫家居約食又貧藜藿供甘旨飢寒無怨嗔富家女多從艷妝貯金屋禦窮賴賢婦採桑及野蔽因此春風面遂爲行人矚

列女 國朝

是時有大寇盤據王家莊叱聲洪雷震怒目紫電光所遇
皆辟易所過盡奔亡既聞賢婦美懷抱遂猖狂役徒數十
人短劍及長槍掠婦入中車左右夾護防求死不可得呼
天亦蒼蒼馳驅如蓬轉須臾到絨旁指賊呼賊名爾何敢
橫行我乃良家女豈向賊中生大寇排然怒爾敢逆我情
手拔轆轤劍耿耿烟青熒視之一無畏色厲語益清大義
責賊徒凜凜霜氣凝玉碎質不改金
燬色終明身形雖已歿至今民共稱

王善志妻金氏早寡撫孤苦守子二錫死於寇媳邊氏年甫二

十撫孤學詩依姑苦守金厯節四十七年邊厯節四十年康熙

十八年并旌

舊志

按縣志以金氏爲邊氏之祖
姑誤今據五公山人集更正

王餘佑王氏世節小引曲逆彈丸地節孝一而足至孝子
王學詩典身葬父在明崇禎十六年而疏題其兩世節母
在今康熙十八年非孝子積德累行勤渠無間精誠所感
上下同風則兩母之苦不顯立名若斯之難也旣而思之
孝子以畎畝一布衣目未嘗識詩書身不出閭井樸茂無
文躬服門內遂爾譽隆朝野賜金表門綽楔烏頭截岸輝
映成德又若斯之易也嗟乎人亦顧自致何如耳爲其易
不忠其難憚其難則易者亦壞矣孝子當典身負母割肉

乞隣時固出於中心之適然毫不計久近難易也乃究竟底成不可磨滅如此昔羅威耕田蔡順食甚不過率其事毋之常未嘗勉而爲之而一時慕其至行千古傳其芳躅史冊何曾負人純德哉余因而更有感也忠孝兩端古今大誼曲逆片壤節孝著矣其流九水處士趙守律枯臥荒山足迹不到人世每遇鼎湖龍忌之日焚香痛哭三十年如一日今賚志歿曾無過而作青蠅之客者噫人何其知孝而不知忠也似又有待矣吁

王餘佑節孝錄贊并敘吾友紫淵札至郵筒中得孝節錄一篇始知王孝子之母夫人及祖母孀節特著而其祖暨父皆懿行敦篤鄉黨推高久矣宜孝子之孺慕罔極也夫睹大江之洪濤浩浩千古而孰知其自岷峨之險混混不窮以至斯永耶贊曰浩浩大江出自岷峨不眠其源孰識其波王氏有子奉親至道霜鉞剗膚功回大造阿母柏舟其風有繇祖母之操實砥中流厥聲所始祖母相傳有孝有德閭里同賢我覲懿範攸好孔馥願言執鞭以作爾僕

庠生田攀龍妻張氏年三十而寡孝養孀姑四十餘年訓子璋

琳及孫錫齡錫祐先後入邑庠邑令吳旌其門

縣志

李際昌妻馬氏夫亡家貧撫遺孤廷璽成立孝事舅姑教子弱冠入泮守節五十二年壽六十九歲邑令旌其門

庠生侯服周妻王氏年十七于歸生二子而服周故氏事八旬祖姑養葬如禮訓次子成名邑令趙旌之

馬騰昇妻石氏康熙二十四年騰昇卒氏年二十三歲茹貧苦守勤紡績事舅姑訓子駮成名六十八歲卒

王焯如妻李氏年三十歲守節事孀姑撫孤琬成立琬及孫鋤均入泮六十餘歲卒

王值妻劉氏年三十歲夫亡撫遺孤書弱冠入邑庠守節三十餘年

徐邃妻李氏年二十七歲夫故家貧撫孤成立八十九歲卒

張福妻石氏年三十歲守節撫孤成立尋亦歿復撫孤孫年八十四歲卒及見曾元成立云

庠生石敬儒妻馬氏年二十七敬儒卒遺孤三均幼氏孝事舅

姑撫孤成立子琢吏員孫光獻入庠以節終

門肇新妻馬氏年十六于歸二十四歲守節撫遺腹子懷先稍長嘗剪髮訓之懷先尋入泮孫誠之亦早年入庠咸以爲苦節之報云

劉貴心妻趙氏年二十貴心卒子幼家貧以緝紵自給矢志苦守卒年六十餘歲

劉自榮妻樊氏榮外出久不歸舅病篤氏割股肉以進病痊姑見其不良於行也始知其事鄉里以事聞邑令王榜其廬曰孝

嫗青陽

均同上

曹二小妻任氏嘉慶五年七月有深州民田二瞰氏獨行邀同村惡馬二疤欲強污之氏堅拒不從被勒而死案定置田馬於

法旌之如例

駁案新編續集

田起龍妻劉氏年二十四歲夫故守節五十二年

武煒文妻陳氏年二十六歲夫故守節四十餘年

庠生蔣元慶妻韓氏年二十六歲夫故守節三十二年

庠生王之衡妻楊氏年二十九歲夫故守節五十餘年

以上俱縣志

庠生高振玉繼妻胡氏年二十二歲夫故守節十二年卒光緒

八年旌

冊檔

庠生董鑰之子源洛聘滿城李守仁之女未婚源洛亡女聞訃
涕泣遂麻衣同母往哭拜訖矢死守時四壁徒立翁姑就衰女
毅然當之無難色嘉慶十年邑令蔡本謙奇其事贈一聯云婦
人嫁曰歸于歸未嫁女子貞不字乃字而貞又九年翁卒事姑
益謹有夫弟幼繼夫叔父爲嗣待之厚弟長授室娣姒間怡如
也旣而生子廷奎卽以爲夫嗣撫育備至迨姑歿女苦處號泣

經理喪葬無隕越焉道光二十三年女年五十餘矣邑令莫蒼
檠爲之請旌訓導吉臨立碣於節孝祠事未竟署保安去二十
八年邑令陳應樞始畢其事咸豐五年卒壽七十有三採訪

莫蒼檠董貞婦碑夫烈夫血憤短衣突鬚餐銓櫻鐫陷死
而不辭者有所激於前也枯禪面石窮林寂壑死灰槁木
滅性而不顧者有所冀於後也前而無所激也後而無所
冀也貞孝婦兼之婦李氏滿城縣李守仁之女許字於完
縣儒童董源洛未及笄髮夫早殤當是時餘禿翁殘媪家
壁立無宿春之糧黠者掉背去贛者縮足辭耳氏麻衣赴
壻家誓死守或勸以宜爲春溫計默不顧枯石落淵井斷
如也夫靜好者感其情也沾渥者安其富也嫺習者漸其
教也氏長農家未授悅乃能徑以志殉面冰心蘖處茅華
餐糠覈窮冬破屋襲敝絮懷然如冰窖雪窟足尺寸不及
闕絕四親通問黨里童孺迄班白卒不識其面垂四十餘
年嗚呼其苦節若此以此事翁姑不問而其孝可知矣以
此撫繼嗣不問而其義可知矣撫叔成人繼又以叔子爲
夫嗣迨翁姑歿克盡禮今叔能報氏以義嗣子已偉然丈
夫念其苦也時館以厚衣鮮食卻不顧曰我茹苦久毋須
此嗚呼可謂難矣貧無資不能得綽楔知完縣事莫蒼檠
聞而慨然曰節媛多矣未有貞孝義歸然逾於枯僧烈士
若孤松立萬仞如氏者幽光宜闡也捐金資爲請旌於

朝得報如所請邑訓導吉臨又爲哀金樹碣貞孝婦之操始傳而究非貞孝婦之志也莫蒼檠曰壽之石爲風化勸爲留心風化者勸

蠡縣

庠生蔣爾恂妻李氏高陽李文敏公之族女也爾恂蓄力學技擊氣嶽嶽抗慨有爲於妻未嘗一狎視氏于歸甫一週爾恂死踰月產一女氏嘗撫其女泣曰汝父丈夫也吾今追憶汝父面目皆恍惚不可省識第爾父執大義吾當執節報爾父閉戶紡績以給饘粥年垂八十白髮蕭蕭猶撫此女毅然時訓以婦道不作兒女態也女適永平教授趙晉升事舅姑以孝稱先氏而

卒云

採訪冊參
恕谷後集

吳道明妻王氏早寡守節孝事孀姑撫孤璽成立順治二年璽

以拔貢入成均氏逾八旬乃卒

雍正
通志

李節妻李氏節明承德郎崇禎時殉國難氏矢志苦守二十載

如一日訓二子復修先後入邑庠

縣志

劉天寵妻李氏年二十五而夫亡勤儉紡績家業賴以不替課子入泮順治九年知縣李給匾旌之

張五品妻何氏年二十二而夫故事姑撫幼孝慈克全子遊泮水苦守六十餘年乾隆初知縣蔣旌其門

劉士俊妻馬氏年二十夫亡訓子有方早歲入泮事姑以孝稱學政蕭旌其門

張博妻楊氏年十八博卒遺孤甫百日撫之成立尋入泮氏事姑盡孝姑疾煎藥燃鬢不覺卒年七十餘歲

劉克昌妻馮氏明崇禎戊寅克昌殉兵難氏年二十七歲無所

出撫夫姪瑀爲嗣教之入庠矢志苦守歷節三十六年

以上俱舊志參

縣志

按劉天寵妻李氏張五品妻何氏劉士俊妻馬氏張博妻楊氏劉克昌妻馮氏舊志列入明茲據縣志校正

庠生馬行可妻李氏行可卒氏年二十九茹貧守節教子入泮

康熙十一年邑令單旌其門

縣志

郭宗孔妻張氏早寡守節紡績撫孤訓之成名長男文炳康熙十五年成進士季文蔚郡庠生

徐洵妻王氏康熙十八年洵卒氏欲殉之舅姑以遺孤爲言乃忍死越五月而孤又殤氏乘間自經釋纒屍不仆而異香特甚邑人爲之徵詩名烈香集邑令趙旭爲之序

趙旭烈香集序死固不易而處死尤難白髮在堂呱呱在抱其義不容死也若上有所托下無所累一死而身名全倫紀立節烈昭綱常備於古得衛之共姜於浙得處州湯煒妻張氏近代則有臨川王氏覃懷之趙貞女於保陽得滿城之范烈女蠡吾之徐烈婦范烈女別自有傳士君子歌和成帙有雪棠集行世固不煩余之喋喋矣徐烈婦懷

慨殉夫事在康熙己未同邑賈生顏處士并爲立傳譜其事詳且悉余讀而嘉其義悲其行且痛其不幸而不獲出於從容就義而遺憾以終也烈婦當良人易簀時執手歛歔曾受血嗣之託雖哀毀骨立業以張陸自許方且欲爲死節之易耳烈婦之心苦矣向使天不欲奪伯麟烈婦必爲歐陽永叔母爲陶士行母爲王珪周伯仁母其幹旋成就當大有可觀豈僅作一硜硜自了之人哉噫烈婦之心良苦矣然而殺身成仁舍生取義又非尋常巾幗之所能爲也推其志於冰雪比操可也諸君子誌美揚休皆殷殷留金石聲賈君彙輯成卷題曰烈香蓋以釋纓挺立殮撫辭香與未醺殉夫海棠變白者同一奇蹟闡幽光而表揚節烈守土者之所不容辭也爰構俚言而併爲之敘趙旭咏徐烈婦詩義烈高千古綱常備一身江山如許地巾幗幾何人月冷婺星黯花辭青塚春白楊聽杜宇歲歲泣芳辰正氣存天壤丹心照碧澌眼枯黃鵠操腸斷白麟兒慷慨悲歌地松筠冰蘖姿貞魂知不泯夜傍雪棠枝

龐國棟妻魏氏夫早卒守節不嫁而祖姑徐氏姑董氏皆先守節三世一堂氏竭力奉養不怠勤女工織棉布一日一端農時躬耨而不與男子交語祖姑年八十餘目昏躬負之如廁向曝反牀復負入姑亦耄壽負出入如之終葬以禮柩發披衰負引

或請代氏曰吾二姑無子孫吾在卽其子孫也不可代乎姑之
窆以夏六月雨水瀾塗氏躬衝水泥擗踊長號從觀者皆爲流
涕其族黨公選近族賢者爲嗣以世其家

李崇龐
魏氏傳

雍正六年旌

縣志

庠生李習仁塏長子奉父命南行卒於天津舟次時康熙六十
年也妻宋氏年甫二十四歲撫遺腹孤守節以終

恕谷後集
李習仁傳

彭浩妻賀氏幼讀書知大義年十五于歸未三年而浩死氏矢
志從死以遺腹忍焉閱月生女而殤氏泣拜舅姑欲以死請適
舅病臥在牀不獲命乃典衣市湯藥目不交睫者月餘比舅痊
遂自縊博野尹嘉銓爲之傳

縣志

楊鳴皋妻崔氏于歸二年而寡氏紡績撫孤執婦道愈謹子以
諸生貢成均邑令高爲請旌

高姓女甥許字李建謨爲室建謨賚志而歿女聞訃奔喪守貞
孝事舅姑乾隆四十六年旌

庠生齊曰苓妻李氏曰苓館於外抱疾歸遂不起氏爲理喪葬
比遷柩之夕竟自經死高陽韓慶爲之傳已旌

監生魏炎妻張氏年十九而夫亡舅老而瞽氏事之謹烹膳澣
衣必躬親二十年如一日遠近稱賢孝焉嘉慶九年當事旌其
閭曰芒寒色正

齊際隆妻王氏早寡守節訓子冠鼎登賢書官汀州同知嘉慶
間旌

武舉魏奇璋妻劉氏年二十歲守節撫孤煩成立入庠道光十

七年旌

俱同上

任維休妻王氏十九歲夫亡孝事舅姑撫前室子成允以拔貢

官靖州知州道光十九年旌

陳琮妻劉氏年十九而夫亡無子女撫夫姪之永爲嗣事姑孝育幼慈之永中年歿撫幼孫國藩遊庠年八十四歲卒已旌
張調元妻史氏年二十五歲夫故撫孤成立孫彬入泮歷節四十四年已旌

段清泰妻蔣氏年二十三守節祖姑病氏晝夜服事衣不解帶者數月戚族皆稱其孝咸豐五年旌

張建勳妻趙氏年二十六歲夫亡家貧氏矢志苦守教二子俱成立一入成均一官訓導人以爲誠孝所感

魏琴堂妻賀氏二十歲于歸二十九歲夫故撫幼子鍾駿入泮苦守三十餘年

職員崔福申妻齊氏年二十八歲守節親老子幼孀娣孤姪氏

矢志苦守舅姑歿氏以田產予娣姪而攜幼子居母家艱苦備
歷垂六十年已旌

劉文治妻劉氏年十九于歸旣而文治出亡不知所終氏守節
五十餘載

以上俱
縣志

張廷傑妻李氏張梅妻王氏李觀光妻張氏李鳳城妻張氏宋
得惠妻石氏俱早寡守節嘉慶元年并旌

齊同達妻解氏早寡守節嘉慶十年旌

鄧文昌妻趙氏宋可謀妻張氏早寡守節嘉慶十一年并旌

以上

櫛
冊

彭長慶妻趙氏年二十四而夫亡舅姑失明氏紡績以養撫夫

姪彭和爲嗣守節五十一年

縣志

王天保妻陳氏年二十守節孝事舅姑三十餘年後舅姑歿喪

葬畢以哀毀成疾卒

魏焯妻王氏十六歲于歸二十六歲夫故撫幼子雲城成立入泮娶婦張氏年二十六歲雲城亦亡氏事孀姑以孝聞王苦守四十二年張苦守四十年一門雙節鄉里稱之

魏煊妻楊氏十七歲于歸二十一歲夫故撫育幼子教之入庠年七十五歲卒

渠縣典史齊紹曾妻黃氏紹曾歿於任所氏年二十歲哀訴上官得周卹由川扶柩旋里備極艱辛守節五十餘年

谷樂善妻郭氏年二十八歲夫亡訓子恩溥入邑庠歷節三十餘年

穆鈞妻王氏

一作楊氏

夫故子尋殤撫夫姪其瀛爲嗣訓之入泮歷

節以終